

112 年全國語文競賽客語讀者劇場文本國小組（南四縣腔）

編號 35 號

### 【擲牙齒】陳美燕原作

頭擺個時代，生活環境無這下恁好，衛生教育還毋曾普遍，大家對保護牙齒個觀念也無恁詳細。像佢，淨早晨頭踎床洗一擺牙齒定定，嘴又好食，蓋好食糖仔，故所，佢對自家做細人仔個時節，不時牙齒痛個印象蓋深。

牙齒一痛啊起來會收人命喔～細人仔嗽到哇天輾地<sup>1</sup>，大人無結無煞。該下仔無麼個止痛藥，阿姆喊佢：「冷水含等！毋好緊嗽！」講越嗽會越痛。臨尾，換牙齒該下，阿姆吩咐，測著舊牙係有息把仔搖，就愛用舌嫵緊西，續等，兩支手指拈等牙齒搖畀落，做毋得喺驚痛。係毋煞猛搖，等新牙暴出來無位仔好企個時節，「歸口牙齒生到葵梨孺瓜<sup>2</sup>，該就蓋醜喔～」阿姆每擺恁仔嚇佢。

細門牙脣口該兩支「虎牙」也盡重要，阿姆講無過細義兜仔，暴出尖尖翹翹個「豬哥牙」來，該就壞蹄地哪！有時節佢看佢懈懈怠怠、無搭無確個樣仔，將就拿一條白線，將佢個牙齒緝

緝緝<sup>3</sup>，出力一掙<sup>4</sup>，牙齒就跔等白線飛出來也。上齡擲核個牙齒，腳愛企比比，擲去<sup>5</sup>眠床腳下；下齡擲核個愛擲上屋頂，講恁仔牙齒正會生過齊。

記得佢有一支後角個大牙板，係分做「撮把戲」個人擲核個。該下仔，佢讀小學二年生，有戲班仔來莊頭做戲搭賣藥仔。佢等賣一種止痛藥水，講牙齒痛個時節點落去就做得止痛，牙齒擲核過後來點，過遽收口止血。佢問現場個細人仔：「有麼人個牙齒落落<sup>6</sup>無？佢同佢擲毋使錢喔～」一片講一片行到佢個面前，奇怪也，佢就無講愛分佢擲啊！佢嘎喊佢嘴擘擘打開開，拿一支鋏仔，手板蓋遽，一下仔就將佢個牙齒擲核也。背尾佢想，定著係企在後背個阿姆偷偷同佢講個。

過大後正了解牙齒個重要性，曉得細心細義注意牙齒個保健。過愛靚個佢每擺看著自家個牙齒生到齊齊無歪核，正知愛多謝阿姆該下仔恁有耐心教佢。

<sup>1</sup> 哇天輾地：音 va' tien' zan ti；大聲哭喊。

<sup>2</sup> 葵梨孺瓜：音 ngau' li' fe' gua'；歪曲不正。

<sup>3</sup> 緝緝：音 tag' hen' hen'；綁得緊緊的。

<sup>4</sup> 一掙：音 id' dui'；用力拔。

<sup>5</sup> 擲去：音 jied hi；丟到。

<sup>6</sup> 落落：音 lod' lod'；鬆脫。

【學騎車仔】李雪菱原作

講著騎腳踏車，係佢最好个啦！三不時都騎等車仔上上下下，下課歸到屋下，書包一揸<sup>1</sup>，就去尋車仔來騎。係無，心情就慍慍悴悴，做麼个都懶蜗蜗仔<sup>2</sup>。

該日仔天時盡好，佢心肚仔歡歡喜喜踴等阿姆去運動公園，緊騎車仔就山歌溜天緊唱歌，路項看著一個阿爸教厥俵仔學騎車仔，大汗過細汗扶等腳踏車緊走，還大聲緊喊：「佢愛放手吔，佢愛放手吔。」實在哪有放手呢！

這分佢恹起頭擺學騎車仔个時節，該下仔阿公身體還蓋健，毋知哪條腸仔直吔，講愛教佢學騎車仔，同後斗个輔助輪仔下核，喚佢騎上去。阿姆哀喲！佢噉噉滾盡噉，頭磬磬仔看等腳踏仔愛箭佢，車頭嘎癩癩倒倒<sup>3</sup>毋知愛幹去哪仔？驚到面呷青<sup>4</sup>，阿公在後尾緊喊：「看頭前，看頭前，佢捉等後盤，你定定仔騎就做得。」就恹仔，像連續劇樣仔，橫倒過跋跣起來再騎，緊噉緊

騎，阿公淨會同吾衫褲撥撥仔，看有鑪著無？看有流血無？過繼續向前騎，害佢噉到目汁濫串<sup>5</sup>盡衰過喔！

經過一朝晨个特別訓練，像海軍陸戰隊个蛙人恹清苦，總算學會吔。還騎去展分阿婆看，害阿婆嚇走一下，目珠擊到大大粒。又過風神碌天<sup>6</sup>騎去分隔壁鄰舍个細人仔看。毋過阿公手軟腳犁<sup>7</sup>，坐在地泥項氣凹凹仔緊噉大氣，頭先喊佢个氣猛毋知哪去吔？

歸到屋下阿公同佢講：「頭擺仔愛學騎車仔無恹簡單，愛去同人租，半點鐘五個銀，歸家个細人仔共下學，大个扶細个輪流騎，下把仔無細義橫到烏青噉血，噉到嘴扁扁仔毋敢聲，大人儕無閒泊杈也無法度搭，總講細人仔天生天養，橫到大噉到大，就自自然然學會吔。」

到這下見看著人學騎車仔，蓋像看著阿公扶等腳踏車後盤个手，分佢安安心心，總感覺著無離開過，今還燒燒暖暖在佢个心肝肚。

<sup>1</sup> 揸：音 fid；丟。

<sup>2</sup> 懶蜗蜗仔：音 lan' guai' guai' e'；意興闌珊。

<sup>3</sup> 癩癩倒倒：音 dien' dien' do do；醉醺醺的，在此比喻騎不穩的樣子。

<sup>4</sup> 面呷青：音 mien gab qiang'；因恐懼而臉色發白。

<sup>5</sup> 目汁濫串：音 mug' zii' lam' con；淚流滿面。

<sup>6</sup> 風神碌天：音 fung' siin' lug' tien'；洋洋得意。

<sup>7</sup> 手軟腳犁：音 su' ngion' giog' lai'；形容疲累異常。

112 年全國語文競賽客語讀者劇場文本國小組（南四縣腔）

編號 47 號

【打極樂仔】黃家馨原作

弄擺，佢盡惱落雨天，見看著天時轉烏陰，阿姆就會喊佢同衫褲收入屋肚，又吩咐佢續手仔摺摺啊。蓋好出去搞个佢，就像分天公爺踢到屋肚共樣，盡毋甘願同衫褲儘採拗一下，慍悴悴仔看等窗門外背落無停个雨，阿爸看佢嘴嘟鼻翹<sup>1</sup>，問佢：「你在該闊麼个？看你个嘴脣皮做得吊三斤豬肉吔！」佢同阿爸講：「天公正式同佢做對頭，昨晡日先生愛考佢等走八百公尺，佢緊拜託佢落大雨，結果一息雨都無，還出大日頭，害佢熱到險險橫核；今晡日係拜六，佢想愛去打球仔，佢嘎瀉大雨，佢正式會分佢闊死！」

阿爸行入間肚，拿出幾隻極樂仔，跔等同極樂仔儘採纏一下，在廳下輕輕拂啊出，一隻、兩隻、三隻，每一隻都迂蓋遽，佢看到盡入文，目盯盯、嘴擘擘毋敢散氣。過一下仔，阿爸又拿三條幼線一頭縳在凳仔項，一頭用手擲纏，同地泥下纏好線頭个極樂仔，一隻一隻擲到幼線項，三隻極樂仔就像在該走相逐，各人一條線，完全無交雜，佢暢到無結煞，緊拜託阿爸教佢。

有心打石石成磚，無心打井井無泉，佢認真跔阿爸學幾擺，就曉得搞吔！佢用左手拿等極樂仔，同線頭放上去，左手手指公揷等線頭，用正手開始纏線，頭兩圈定著愛擲纏，續下來纏等去，纏到伸三股一个時節就做得吔，換正手手指尾纏兩輪，用正手拿好極樂仔，左腳踏頭前，正腳在後背，正手頭前後背晃幾下，看準目標，正手到頭前个時節出力擲啊出，極樂仔就開始迂迂轉吔！

打極樂仔个時節，看等極樂仔迂迂轉，有時會打斜，佢等會用索仔在脣口燙一下，極樂仔黏時就變正吔；有時縳一條幼線，分極樂仔對這頭行到該頭，像教極樂仔行路樣仔，正式蓋生趣！阿爸講：「人生乜係恁仔，愛行自家正確个路，毋罅力个時節，用索仔在脣口督一下，極樂仔就會迂過遽；打斜抑係行歪个時節，用索仔教極樂仔變正，像阿爸長透教你做人个道理共樣。」

這下，隨在佢天公幾時愛發風落雨，幾時愛出日頭，佢乜無相干吔！佢顛倒愛多謝天公爺落大雨，分阿爸毋使出去做事，做得同佢做伴，緊打嘴鼓、緊搞極樂仔，正式盡生趣！人生像極樂仔共樣，緊迂緊迂，各人行自家个路，多謝爺哀、先生同朋友，輒常在脣口督醒佢，牽成佢，有佢等个用心指導同鼓勵，佢正有信心去打拚，正毋會行差路！

<sup>1</sup> 嘴嘟鼻翹：音 zoi du pi ngieu；形容心裡不高興。

【阿咪<sup>1</sup>】李夢花原作

佢屋下從來就毋識畜過狗仔、貓仔，一來係阿姆歸日仔做事無閒直掣，還愛無閒煮三餐，二來係佢盡好淨，畜狗仔同貓仔驚怕會遭跳蚤。一直到老弟間房个天棚頂，每暗晡一群老鼠仔在該走來走去，呼呼磅磅<sup>2</sup>吵到佢睡毋得，正高不將同上屋个鄰舍，扭一隻細貓子畜來打老鼠。

鄰舍个貓嫲這胎正降兩隻，一隻就係佢屋下這貓子，老鼠色間<sup>3</sup>等白色同豬肝色花喇花喇<sup>4</sup>，看起來蓋精靈、盡得人惜，佢等喊佢「阿咪」。另外該隻柑仔色間等白色，乜異靚，分雜貨店个姆姆扭去畜。阿爸講新扭來个貓仔，定著愛綯到有四支桌腳个下背幾日仔，恁仔正會認屋，阿爸就同佢綯到桌腳下。斷真有影哦！幾日後放佢，阿咪就一等乖，毋會儘採走。

因為毋識畜過貓仔，阿姆乜毋知愛分佢食麼个？人講：貓愛食腥。阿姆就用四破魚攪飯飼。一站仔過後，阿爸講：「毋好分

佢食忒好、食忒飽，慣序哋就毋會去打老鼠。」聽雜貨店个姆姆講佢屋下該隻，就係食到肥固固仔，日日食飽睡、睡飽食，連老鼠仔對脣口過，佢淨目珠擘開看一下，做佢睡。該幾日个朝晨，阿爸就去豬砧買一塊豬肝分阿咪食。第一擺豬肝買歸來，阿姆愛拿來煮熟，阿爸共快講：「分貓仔食生豬肝，係愛佢慣序食生个味，恁仔正會去打老鼠，佢下二擺打著个老鼠，你愛煮熟正分佢食麼？」阿爸講个異有理，佢等聽哋嗻啊會死。

阿咪日時頭走到倉庫睡目，暗晡頭就係佢行動个時間，在暗摸脣疏个暗晡頭，看著佢个目珠仁，像兩粒青色个寶石樣盡金盡靚，灶下个黃蜚趁來趁去，佢一爪抓一隻，一等流掠。就毋知佢曉得打老鼠無？毋過，自阿咪來哋過後，老弟間房个天棚，就無老鼠仔在該跳舞哋。

毋多知仔，阿咪畜有十四年哋，照佢等人个年紀算，佢有七十零歲哋。該日阿咪懶甥甥仔無精神，食个東西又翻出來，好得看過獸醫注射過，幾日仔就好哋。阿姆嗻嗻仔對阿咪講：「你同佢共樣，老哋！」阿咪蓋像聽得識樣仔，第二日打一隻細老鼠別試放在灶下，像係愛同阿姆講：「莫笑佢老刀嫲無鋼——奈毋何，佢還蓋壁哪！」動物除哋毋會講話，佢等同人共樣，係有感情有靈性个，還有該種毋認老个打拚精神啊！

<sup>1</sup> 阿咪：音 a' mi；專有名詞。貓的名字。

<sup>2</sup> 呼呼磅磅：音 bin' bin' bong' bong'；狀聲詞。形容老鼠在天花板亂竄的聲響。

<sup>3</sup> 間：音 gam；混合摻雜。

<sup>4</sup> 花喇花喇：音 fa' la' fa' la'；形容顏色混雜的樣子。

112 年全國語文競賽客語讀者劇場文本國小組（南四縣腔）

編號 51 號

### 【大箍牯減肥記】曾菁怡原作

「哇！歸桌仔恁多好料！汽水、餅仔、披薩、雞卵糕、枝仔冰，還有偌盡好食个炸个同雞髀。」偌看到無瞞目，口涎水都會跌下來也，該兜好料像同偌搵手講：「共快來食，共快來食哦！」偌趕緊抓一支噴香个雞髀，該黃蠟蠟仔个皮炕到喇喇，肉汁汀汀汀汀，實在還錫人啊！就在偌嘴擘到大大，準備咬啊下去該下，嘎聽著：「大箍牯，還毋玩床？會赴毋掣讀書也！」全部个好料一下仔嘎毋見核，原來，係發夢啊！有一息仔毋甘願，該雞髀無咬著，實在還浪核哦！

聽吾姆講，偌從細就盡好嘴斗，生到肥嘟嘟仔，幼皮白肉，盡得人惜。公太就盡愛捏吾面頰卵，講偌像正打好个粿粿仔分人想愛咬一口。原本偌無感覺肥固固个身材有麼个毋好，但係該擺見笑个經驗分偌決心愛減肥也。

該日學校辦校慶活動，吾班級表演「三隻豬仔」个話劇，偌擔任豬大哥个角色。就在節目進行到豬大哥同豬二哥為著閃避大野狼，愛走去豬老弟个屋仔屏該下，為著愛有緊張个氣氛，偌潑命牯颯過去愛透入豬老弟个屋仔裡背。哪知得，一下仔忒大力，

豬老弟个屋仔嘎分偌撞橫下去，偌還仆啊在屋仔頂頂，屎肫翹到半天高，緜繃繃个褲弓到暴線縫。該時，鬧熱煎煎个禮堂忽然間變到十分恬靜，偌還聽得著自家砰砰砰个心跳聲，額頭流下來个汗水每一滴，偌就感覺得著，實在還見笑哦！愛仰結煞正好？落尾，有聲音同偌解圍也，偌共快企起來行到舞臺脣換褲。該聲音，毋係偌期待个拍手聲，係大家嗆到歸身仔緊顫、目汁緊流个笑聲。

校慶結束該日，桌頂个乳茶、雞排全部分偌擲到地圾桶，偌第一擺有恁堅定个決心，絕對愛減肥成功。偌去網路尋減肥个方法，大概係減量、減油、減糖，還愛配合適當个運動，故所該兜油漬漬仔个炸个東西、甜滋滋仔个汽水、糖仔一概分偌拒絕，每餐飯菜都食過清過齋一息仔，食到七分飽就好。偌還每日運動三十分鐘，行路、打球仔、跳索仔……每日做無共樣个變化。

一隻月過後，吾姆帶等偌去買新衫褲，每一領都減兩個尺寸，阿姆講：「從今以後做毋得過喊你『大箍牯』也。」「係啊！你愛喊偌『緣投哥』也。」

大箍牯減肥，成功！

112 年全國語文競賽客語讀者劇場文本國小組（南四縣腔）

編號 54 號

【 蜈蚣仔<sup>1</sup> 】徐姿華原作

記得讀二年生該年，連續落雨幾下禮拜，落啊人都硬硬會生菇地！直直到拜三朝脣斷雨腳<sup>2</sup>，當晝放學還有日花對貴貴个烏雲肚箭出來，大家都盡歡喜，排列行出校門，著等水靴筒蠻皮个細佬仔就開始躡水搞，泥水激啊脣口个細妹仔同學吱吱滾，緊閃、緊跳、緊走，笑聲、叫聲、罵人聲，跔等轉好天个天時，大家个心情也像慢慢散核个烏雲緊來緊開。

佢同老弟歸到屋面前个楓樹伯公下，看著一堆細細尾、頭大大、烏烏个魚仔在路脣落雨過後个細水窟肚，汨來汨去蓋生趣，佢等跔等看啊都毋記得好歸，阿婆等無佢等，行出禾埕大聲喊，佢等正真毋甘願行歸屋下。

佢兩個人等阿婆去睡當晝，偷偷仔拿等空个乳粉罐，去楓樹伯公下扭魚仔，驚大人知地會罵，佢等就同扭著个六尾魚仔，偷偷仔畜在書桌下，愛去上課同放學歸來都會先去看一下，等愛寫字个時節正同佢等拿出來放桌頂，陪佢等寫字。

第三日打早，老弟去看地魚仔趕緊愛去上課，乳粉罐無放好

勢嘎橫核，等佢等下晝歸到屋下，水差毋多會流淨地，罐仔項淺淺个水肚伸著一尾魚仔定定，另外五尾燥死在書桌底下地。佢等盡傷心，同五尾魚仔埋啊花園肚个桂花樹下，希望佢等使得鼻得著桂花个香味。伸著該尾細魚仔，佢等也過細心細意照顧佢，大約一禮拜換一到水，還分佢食嫩嫩个菜葉。

十過日後，該尾魚仔嘎生出兩支腳，佢等試著魚仔會生腳盡生趣，忍毋核偷偷仔同阿爸講，阿爸看地講：「該毋係魚仔，係『蜈蚣仔』、蜈仔个細人仔。」差毋多又過一禮拜，蜈蚣仔又生出前腳地，有四支腳還有尾，在水肚汨來汨去，盡風神。

學校放暑假地，阿姆同往年共樣帶佢等歸外阿婆屋下寮一禮拜，佢等心肝肚掛吊等書桌下个蜈蚣仔，等都毋掣就緊嚟愛歸。一歸到屋下，老弟黏時舂入間肚，跔等就噉啊大嫲聲，佢等行李攞都毋掣，就走入間肚去，看佢做麼个噉？老弟指等空空个乳粉罐同脣口跳啊跳个蜈仔，噉啊噉氣毋轉，講：「鳴……蜈蚣仔……分蜈仔食核地啦！鳴……。」阿爸聽著，緊掌老弟个頭那，忍等噉老弟講：「大驚牯，若蜈蚣仔大地，變做蜈仔地啦！毋係分蜈仔食核。莫噉啦！」老弟聽著恁仔講，正轉笑面。

因致<sup>3</sup>童年畜「蜈蚣仔」个經驗，分老弟對自然科學盡有興頭，這下老弟已經係蓋受學生仔歡迎个自然科先生，也輒輒會帶細人仔一哪仔去做研究呢！

<sup>1</sup> 蜈蚣仔：音 guai` ngiam e`；蝌蚪。

<sup>2</sup> 斷雨腳：音 ton` i` giog`；雨停了。

<sup>3</sup> 因致：音 in` zii`；因為。

112 年全國語文競賽客語讀者劇場文本國小組（南四縣腔）

編號 59 號

【剃頭】張美容原作

前幾日去剃頭店剃頭，看著一個兩、三歲个細人仔，為著剃頭噉到噉殺天<sup>1</sup>，大大細細全部斯搥到汗流脈絡，實在還衰過哪！佢這下過大也，剃頭該時毋敢噉，毋過還係盡驚剃頭，乜共樣恁惱剃頭！

佢驚剃頭，係因為佢盡無膽，驚師傅手項該支剪刀同剃頭刀。見擺一坐啊凳仔項，冚好剃頭个措裙，看著師傅拿等剪刀對等佢，佢就開始緊掣<sup>2</sup>，感著過核千年恁久毛正剪好，正想啟下氣頭，師傅又拿等利利个剃頭刀愛來刮佢腦之背<sup>3</sup>个毛腳，這下還過得人畏也。佢驚到頸根緊鉤、屎肫在凳仔項扭上扭下，師傅一頭刮、一頭咄佢毋好停動，無奈勢何，佢牙根齧等、拳頭嫵搭等，任在人剝割。係走得得，佢定著落尾仔瀉，一分鐘就毋停跔。唉！剃頭實在得人驚！

到三、四年生起勢，膽過在<sup>4</sup>也，無恁驚剃頭，嘎變啊惱剃

頭，因為師傅該張嘴蓋得人惱，佢總係在同佢剃頭該時，講拏著一大波籬有个無个。可能大家係老鄰舍忒熟事也，佢蓋輒緊剃緊同佢打嘴鼓，一下問：「你个頭那毛掖麼个肥？仰會生到恁靚、恁多？」一下仔又講：「營養毋好專門搥到頭那毛去，愛食過高大兜仔正有影哪！毋好像矮牯鯽樣矮佢佢仔<sup>5</sup>。」佢面皮薄、驚見笑，目珠不時眨等詐無聽著，一肚屎懊躁想：「仰結煞！脣口个人定著在該噉佢也啦！還惱！還惱！實在還惱剃頭。」

最冤枉个係，有一擺師傅毋知仰仔，剪刀一溜<sup>6</sup>，嘎同佢个耳公剪一個空，血黏時流出來。師傅緊同佢膏藥仔，緊嘍嘍咿咿个講：「頭那毛恁多，蓋毋好剪。」仰仔嘎變到佢毋著！歸到屋下想愛同阿姆使妮，無想著阿姆毋單只無安慰佢，顛倒罵佢講：「毋恬恬坐等分人剃哪！耳公無分人剪核就盡好也。」限勢佢愛噉都毋得嘴扁，聽著阿姆恁仔講，黏時「哇！」一聲噉出來。係做得，佢甘願做長毛賊<sup>7</sup>也無愛去剃頭。

剃頭个戲齣，幾個月就愛再過來一擺，還艱苦哪！佢日日想、日日望，想望遠啊大，做得像大人樣，去電毛店剪頭那毛，腳交等，有冷氣好吹、有人同你捉背筋，還有人斟茶分你食，毋知幾好仔哪！

<sup>1</sup> 噉殺天：音 veˋ vongˋ sadˋ tienˋ；大聲哭喊。

<sup>2</sup> 緊掣：音 ginˋ cadˋ；不停發抖。

<sup>3</sup> 腦之背：音 noˋ ziiˋ boi；後腦杓。

<sup>4</sup> 在：音 cai；穩固。

<sup>5</sup> 矮佢佢仔：音 aiˋ dudˋ dudˋ eˋ；矮嘟嘟的。

<sup>6</sup> 溜：音 liu；滑開。

<sup>7</sup> 長毛賊：音 congˋ moˋ ced；形容像盜賊一樣披頭散髮。

112 年全國語文競賽客語讀者劇場文本國小組（南四縣腔）

編號 62 號

【秘密森林】林貴珠原作

佢從細盡好在山林裡背、河壩脣搞寮，一到放寮日就一哪仔野上野下搞到斷烏正歸屋。記得讀小學該下，總係好跣阿娥厥姆去美濃山下拈樵，阿娥厥爸盡早就過身也，單淨倚恃厥姆做小工來畜一屋仔大細，阿娥盡知人我，放寮日都會跣厥姆去山頂拈樵相添，佢輒常跣衫尾，同佢等共下去山林裡背遠寮，對佢來講這座山林裡背全全寶。

打早佢就背等飯包同佢等共下去，在山林裡背佢等搞措目屏窟，同這一大片个山林變做佢等个運動坪躡上躡下<sup>1</sup>，在樹頂跋上跋下無輸山猴仔，麼个愁慮早就飛走也，飛到天恁高，佢个心情就像著等靚靚花裙在該跳舞个揚蝶仔，飛上飛下恁自在、恁快樂。走到大汗過細汗就去山坑脣搞水，山坑水清又清、淋一口透心涼，坑水涼又甜，過贏雜貨店个枝仔冰。續等搵石頭捉蝦公、捉毛蟹、捉魚仔，唱等佢自家个山歌，快樂个歌聲跣等坑水傳遍歸個山林壁角，流過莊頭，流到闊野野个天際。

有時會有膨尾鼠來樣陣，厥面頰卵蠕蠕動看等佢等手項个零

嗒，錫到厥口涎水就會跌下來也，盡得人惜；還有領領拜个山狗太，佢看你，你看佢，有時又自家搞到四腳惹天，盡生趣。行到笏竹頭下聽著唧唧唧个聲音；佢就同手項銅罐仔裝滿个水灌入地泥个空，無幾久就看著另外一個空越出土狗仔來，一隻、兩隻下擺仔做得透著三、四隻个土狗仔。搞啊癢也坐在香絲樹下，山風柔柔吹過樹林，聽等土狗仔唧唧滾鋸弦仔，山坑水同笏竹和出大自然个音符，這係最錫人聽个樂曲。

暢樂个時間總係恬恬仔溜啊過，一瞞目就到斷烏也愛歸屋也，猴嫲背等細猴仔攀籬吊壁愛轉竇，佢等就踏等紅霞下山，貓頭鳥咕咕滾同佢等講「正來寮」，伯姆孩等滿滿个幸福，佢也袋等滿滿个快樂歸來，感謝這座山林加添佢生趣又無共樣个童年生活，感謝一路里來陪等佢成長个好山好水，對佢來講搞上搞下毋當美濃山下，這係佢心肝肚最靚个秘密森林。

<sup>1</sup> 躡上躡下：音 lung<sup>ˇ</sup> song<sup>ˊ</sup> lung<sup>ˇ</sup> ha<sup>ˊ</sup> / liung<sup>ˇ</sup> song<sup>ˊ</sup> liung<sup>ˇ</sup> ha<sup>ˊ</sup>；跑來跑去。



112 年全國語文競賽客語讀者劇場文本國小組（南四縣腔）

編號 63 號

### 【像戇仔个天才】葉秋菊原作

「人不可貌相，海水不可斗量」這句話來講阿明牯，實在盡對班<sup>1</sup>。佢乜相信天公爺同你關核一扇門，定著會同你打開另外一扇窗。

見擺佢等愛重新分班該下，心情就像老鼠仔跌落米缸肚，一重歡喜一重愁，歡喜个係做得熟事新朋友，愁个係毋知會有仰仔个人同佢共班？蓋記得開學該日，遠遠看著一個手癩癩腳跛跛个細俵仔行入教室，該個人頭臥臥仔，嘴弛弛仔<sup>2</sup>緊行緊噓，看起來戇戇，佢恹佹怕係行毋著教室也，愛去隔壁个資源班正著啊！。

該細俵仔的對<sup>3</sup>坐在佢隔壁。先生特別同大家介紹這細俵仔，講佢安到張忠明，手腳過毋方便，愛打幫坐佢脣口个人，發揮同學愛，搵手照顧。張忠明？佢話著係當聰明，險險噓出聲來，一恹著新个一年愛同佢比比坐，面就孬核一半。佢頭側側仔偷看佢，唉！係生到白淨白淨盡清秀个細俵仔呢，但係透日仔口涎水瀉瀉汀汀<sup>4</sup>，同頸根圍等該條措布當<sup>5</sup>，汀到溼漉漉仔，分人看著目

汁就會跌出來，同情心在佢心肝肚慢慢仔翻轉，佢慢慢仔幹轉頭同佢噓一下，佢試著佢蓋得人惜喔！

佢該班个孱剝頭總係撩撩刁刁，奈冬瓜毋何，捉瓠仔來捋毛，看忠明好欺負，就學佢行路孔孔翹翹个樣仔，無就去撚厥屎舂，好性个阿明就目瞞瞞仔任人搵射，佢一肚屎个懊躁<sup>6</sup>，盡想行前去代佢出頭。

阿明牯盡有志氣，同佢等共樣上課，共樣寫作業，淨寫字過食力，過慢板定定，學生仔該該愛做个本分，佢毋識懈怠過。有一日上數學，先生出著一個題難過上天，佢頭那想到必析<sup>7</sup>乜想毋出來，大家都額結結仔無人曉得，哪會恹著阿明牯嘎毋使兩分鐘就算出來也。大家目珠擘到恁大粒，盆頭講到鉢也無人愛信，戇仔仰會變精也呢？原來佢係一個天才啊，起先話著佢係戇仔个佢壞勢到面紅濟炸，還想尋一個空鑽入去唷！

見擺看著搞到昏天暗地毋知頭天个佢等，同拿等隨身聽恬恬聽英文、嘴項迪迪凸凸背出一大串英文个佢，就會面紅，實在爭天差地啊！人講：一枝草一點露，天公爺係公當个，雖然無分佢健全个圓身，毋過有分佢聰明个頭腦、上進个心，在未來个路項，大家都毋使為佢煩惱為佢愁也。

<sup>1</sup> 對班：音 dui ban<sup>ˊ</sup>；喻合適、貼切。

<sup>2</sup> 嘴弛弛仔：音 zoi ie<sup>ˇ</sup> ie<sup>ˇ</sup> e<sup>ˊ</sup>；嘴咧得開開的。

<sup>3</sup> 的對：音 dag dui；正巧。

<sup>4</sup> 瀉瀉汀汀：音 dong<sup>ˇ</sup> dong<sup>ˇ</sup> din din；形容液體不停的自物體上滴下來。

<sup>5</sup> 措布當：音 em<sup>ˊ</sup> bu dong；圍在脖子上的圍兜。

<sup>6</sup> 懊躁：音 au zau；懊惱。

<sup>7</sup> 必析：音 bid<sup>ˋ</sup> sag<sup>ˋ</sup>；裂開。

112 年全國語文競賽客語讀者劇場文本國小組（南四縣腔）

編號 64 號

【賣菜】謝惠如原作

記得讀三年生該下，屋下人多食用乜多，阿姆除了田事還愛打理屋下人个三餐，故所利用屋側角該塊空地來種菜，種啊種仔，菜嘅多啊食毋去，將就載去街項賣。

九冬十月禾仔割核後，一個奈日阿姆愛佢跔佢去搵賣菜，去到菜市場个路脣，阿姆頓好腳踏車，同後盤疊到尖起來个角菜仔，下十過抓<sup>1</sup>下來喚佢在該掌等賣，無講橫無講直佢自家又隨載去街項迂等來賣也，丟佢一個人在該呆呆，毋知愛仰結煞正好。

佢本成就面皮薄，見看著毋識个人就會面紅濟炸，莫講愛喊人買菜，無結無煞个佢，壞勢到頭犁犁仔，全毋敢臥起來看人，好得隔壁賣番薯个老伯姆看佢恁恬又畏相，嗆嗆仔講：「細阿妹仔，毋使驚，你做你大聲喊賣菜，人家聽著就會撇轉來看你賣麼个，無定著有佢想愛買个菜，鴨嫲嘴乜罔吮正有好食，來！佢喊分你聽：『來唷！來買番薯唷！好食个番薯仔，粉又甜哦！包你食也還會倒轉來買唷！』」聽著老伯姆个喝賣後，佢就膽膽仔試喊啊：「來唷！來買菜哦！一抓十個銀定定。」正喊啊煞，一個

阿姨聽著隨停下來買，還說佢恁乖恁曉得。聽著佢个褒說，佢暢到緊喊緊大聲，行過佢面前个人，十個有八個大概會恬下來同佢買菜，無幾久就賣核，分佢試著賣菜一息都毋會難。

冬下頭日仔短，臨暗放學歸到屋下，鞋一脫衫一換，隨走去菜園同阿姆搵摘菜。暗晡頭食飽夜後，同阿哥兩個人開始擇菜、秤菜，佢等負責个事頭，除了愛同一頭一頭有黃葉同燥葉个蓋<sup>2</sup>擘核以外，還愛同有泥个菜蓋搵淨來，整理清淨好勢也，正一抓一抓秤畀平重緝起來。阿姆不時吩咐佢等：「有東西好賣，斤兩定著愛罅擺，雖然正十銀八角又乜係錢，秤頭就係路頭，毋好去梟人。還有賣食个東西，自家愛敢食个正好拿去賣人。」這兜話佢全記在心。

賣菜雖然係一種小生理賺無麼錢，也無麼个大學問，毋過對這擇菜、賣菜个過程中，分佢學著蓋多做人做事个道理。

<sup>1</sup> 下十過抓：音 ha` siib go za`；解下十多把。

<sup>2</sup> 蓋：音 hab`；老菜葉、外葉。

112 年全國語文競賽客語讀者劇場文本國小組（南四縣腔）

編號 69 號

【鬧熱个落雨天】曾菁怡原作

鬧鐘鈴、鈴、鈴響吔！大嫲聲喊偌共快趺床，再過忍床就會赴毋掣去學校讀書吔。偌目絲絲仔伸手掀核鬧鐘，還過眠在鬆爽个眠床，毋盼得同佢分開。咦！毋係天光吔吓？外背仰還會暗摸胥疏？探頭看啊出去，原來係天公派烏雲使者來通知偌等——愛落雨吔！

有人認為落雨天係麻煩天，出門愛著水衣，無就擎遮仔，無細義衫褲又會涿到溼溶溶仔，去哪仔都無方便。學生仔盡惱無法度出去打球、搞寮，一下課先生就掌等，麼人都做毋得出去涿雨，故所一看啊著落雨，大家就唉唉唧唧，眼盯盯仔看等雨水號等歸個運動坪，實在還慍悴哦！

毋過，落雨天對偌來講嗰係盡鬧熱个日仔。朝晨一出門，歸路項一哪仔都係車仔，這片嘩嘩；該片叭叭，像盡久無見个朋友相借問樣仔，大家尖共下講起恁久無看著个思念。該兜行路个人，擎等一支支遮仔花，雨水一涿，黏時就開出五彩个花蕊，行來行去像比麼人个花過鬧。你係聽過真兜仔，該雨水打在車仔頂、屋頂、水窟仔還係樹葉仔頂高个聲音全部無共樣，有高，有

低；有大聲，有細聲，像唱歌仔分你聽樣仔。有成時，雷公還會用曠燼打燈光，用響雷公來和聲，你講，係毋係盡生趣？

偌盡好在落雨天打早就去學校，因為該兜平常時屏塞塞个蠅螺仔、蟻公全部都會趟出來搞水。學校圍牆泥壁頂个溜苔青溜溜仔，落雨該下，蠅螺仔歸陣仔趟上趟下，有兜相爭看麼人趟過遽，有兜幹來幹去做起畫圖个藝術家，有兜恬在圍牆頂高享受涿雨个清涼，逍遙自在。

落雨天出來搞寮个蟻公盡好膽，衫褲無著就緊拚拚仔<sup>1</sup>出來搞水，壩坑裡背朗朗滾个水流盡刺激，幾下尾蟻公分水沖過去還會搖來擺去，暢啊無結煞。有兜蟻公大擎擎仔趟到路項來，過砸身个還做得趟歸去；過媿个將就橫在路徑項，分天公做主吔！

鬧熱个落雨天，有人懊燥，有人歡喜，天公無法度分每一個人合意，只有偌等自家改變想法，毋管麼个天都係盡好个天。

<sup>1</sup> 緊拚拚仔：音 gin`bia bia e'；喻急迫的樣子。